

SCRIPTA

Numéro Scripta : 794

Auteur(s) : Raymond Passemer, Eu (bailli)

Bénéficiaire(s) : Le Tréport, Saint-Michel (abbaye)

Genre d'acte : charte

Authenticité : non suspect

Datation : 1292, 29 novembre

Action juridique : règlement conflit

Langue du texte : ancien français

Analyse

Accord passé entre les moines du Tréport et Guillaume de Cantepie, écuyer, au sujet du droit de justice à Lignemare

Tableau de la tradition

Éditions principales

a. Laffleur de Kermaingant Pierre, *Cartulaire de l'abbaye de Saint-Michel du Tréport (ordre de Saint-Benoît)*, Paris, Didot, 1880, n° CCXXXVII, p. 268-270.

Texte établi d'après a

A tous cheus qui ches lettres verront ou orront Raimmont Passemer, ballif de Eu, salut. Conme contens fust meü entre hommes religieux l'abbé e le convent du Troiport, d'une part, e Wyllaume de Cantepie, escuier, d'autre, sus che que le dit Wyllaume avoit fet justise e pris nans en un fié que les dis religieux ont en une ville que l'en apele Mellemare, e les dis religieux eussent mis gage e plege que le dit Wyllaume avoit fet justise ou il ne pooit ne ne devoit ; e pour che que les dis religieux ne voleient mie contenchier ne plesdier au dit Wyllaume, par concel de bone gent, il s'acorderent e le dit Wyllaume autresi que monseigneur Henri de Grantcort e mesire Wyllaume de Pierrepont, chevaliers, seussent e enquersissent combien les aides costumieres e les corvées de chu fié porroient valoir a pris d'argent, e che que il diroient que il devroient valoir, le dit abbé e convent rendroient au dit Wyllaume, a achater rente en son fié ou la il vodroit, ou a fere sa volenté de l'argent, ja soi che que il ne conoissoient que le dit Wyllaume eust en chu fié ne justise ne segnourie ; e comme contens fust entre eus, en la cort de anorable homme e discrest l'official de Roam, meü par la raison de chele justise, les desus nommés abbé e convent e le dit Wyllaume se mistrent du tout es deus chevaliers desus nommés, mesire Henri de Grantcort e mesire Wyllaume de Pierrepont desus nommés, a fere leur volenté, e se obligerent a tenir fermement, sans aler de riens encontre, tout che que les deus chevaliers desus dis diroient ou ordeneroient des contens e des debas desus dis ; en tele maniere que se il n'estoient a acort, que mesire Robert de Saint Pierre, chevalier, eleu e nommé des parties desus dites, seroit le tiers, e a che ou il s'acorderoit avec un des autres seroit tenu fermement, sans che que nule des parties en peust aler de riens encontre : nous faisons assavoir que les parties presentes par devant nous, que le dit monseigneur Henri e le dit monseigneur Robert, qui apelé estoit le tiers miseur, pour le debat qui estoit entre le dit monseigneur Wyllaume e monseigneur Henri, rendirent leur dit en le maniere que il en sieut, ch'est assavoir que le dit abbé e convent rendroient au dit Wyllaume vint e une livre, sept souz e sis deniers tornois pour toutes choses, e que, des ore en avant, le dit Wyllaume ne ses hoirs n'aroient justise ne segnourie sus le devant dit fié, pour nule chose quele que ele fust ; e, des despens fês en la cort de l'official, que nul ne seroit tenu a rendre riens a l'autre, e qui plus aroit mis, si s'en soffrist. E chest acort fu aporté par devant monseigneur le conte e devant son conceil, u jour du samedi en le vegille saint Andrieu l'apostre, qui fu en l'an de grace mil CC. e IIIxx. e douze, e, par le conceil que monseigneur le conte en eut, il quemanda que nous feissons as devant dis abbé e convent lettres seron chest acort.

E u tesmoing de che e en ensivant le quemandement monseigneur le conte, avons ballié au dit abbé et convent ches lettres seellées du seel de le ballie du conte de Eu. Fetes en l'an e u jour desus dis.